

Pa Pilimuná Pulosay kágad Pa Pilimuná Pulosay kágaday pajjár

Salám o drót

¹ Cha Pulosay némagá, mane Pulos ke pa Issá Masihaygi zendáná bandig án o cha may brát Timutáusay némagá,

pa may dóstigén hamkár Pilimun o

² gohárén Apyah o hamráhén johdkár Arkipus o pa hamá báwarmandán ke shomay lógá pa ebádatá yakjáha bant.

³ Cha may Hodáén Pet o Hodáwandén Issá Masihay némagá shomará rahmat o émeni sar bát.

Dwá o shogrgozári

⁴ Man har wahdá ke wati dwáyáni tahá tará yáta kanán, modám wati Hodáay shográ gerán,

⁵ chéá ke tai imán o tai mehray hál maná sar bayagá ent, hamá imán ke tará Hodáwandén Issáay sará hastent o hamá mehr ke tará pa sajjahén palgártagénán* hastent.

⁶ Mani dwá ent ke hamá imán ke máshomá áia sharikdár én, tai zánt o zánagá géshter kanát. Har sharrén chizzé ke mára cha Masihay barkatá hastent, áiaý bárawá tai zánt géshter bát.

* **1:5 1:5** “Palgártagén” hamá mardom ant ke gón Issá Masihay hóná cha wati gonáhán shódag o pák kanag butagant o é dhawlá pa Hodáyá dar chenag butagant.

7 Mani brát! Maná tai mehráni sawabá mazanén wasshi o delbaddhié† rasetag, chéá ke taw palgártagénáni del, árám o táhir‡ dátag.

Ónesimusay bárawá Pulosay dazbandi

8 Bell toré man Masihay barkatá pa deljami tará hokm dáta kanán ke ché bekan o ché makan,

9 bale mane Pulos ke pirmardé án o annun Issá Masihay háterá bandig án, mehray bonyadá gón taw dazbandié kanán.

10 Man gón taw Ónesimusay§ bárawá dazbandia kanán ke imánay hesábá mani chokk ent o bandi-giay wahdán maná rasetag,

11 hamá ke pésará tará hecch páedagi nadát, bale nun pa taw o pa man, doénán páedagmand ent.

12 Man áia pa taw per tarrénagá án, bezán wati delá pa taw rawán dayagá án.

13 Nun ke man pa wasshén mestágá* bandig án, man lóthet ke áia wati kerrá bedárán ke tai jágahá á mani hezmatá bekant.

14 Bale bé tai razáyá man hecch kanaga nalóthán ke taw hecch kár pa majburi makanay, tai jenday wáhag o razá gón bebit.

15 Balkén á pa kasánén wahdéá paméshká cha taw sestag o dur butag ke pa modámi tará berasit,

16 bale cha ed o dém golámé hesáb mabit, cha goláméá báláter, dóstigén bráté hesáb bebit. Maná wa sakk dóst ent, tará angat géshter dóst ent, ensáni hesábá ham o Hodáwanday sará báwarmandén bratéay hesábá ham.

† 1:7 1:7 Delbaddhi, bezán shábásh, sekén, tashwik. ‡ 1:7 1:7

Táhir, bezán árám, karár. § 1:10 1:10 Ónesimusay máná ent

“kárámad, páedagmand”. * 1:13 1:13 Mestág, bezán wasshén hál, bashárat.

¹⁷ Nun agan taw maná wati sangaté sarpada bay, gorhá Ónesimusá anchó dast ger ke maná dasta geray o

¹⁸ agan tai káré harábi kortag yá áiá tai wámé per ent, áyán mani hesábá nebeshtah kan.

¹⁹ Mane Pulos é gappá daste wat nebeshtah kanagá án: “Manesha dayán o tará nagwashán ham ke tará é nókén zend mani barkatá rasetag o taw mani wámdár ay.”

²⁰ Haw mani brát, mana lóthán ke pa Hodáwandaygi cha taw páedagé begerán. Pa Masihaygi mani delá é árám o táhirá beday.

²¹ Man deljam án ke taw parmánbardaré ay, paméshká pa taw nebeshtah kanagá án, chéá ke mana zánán, inchok ke mana gwashán, taw géshtera kanay.

²² O dega gappé, pa man jágahay band o bastá ham bekan, chéá ke maná omét ent ke tai dwáyáni barkatá ázáta bán o tai kerrá káyán.

Goddhi drahbát

²³ Épáprás ke pa Issá Masihaygi gón man yakjáh bandig ent, tará saláma kanagá ent.

²⁴ Mani hamkár Markás o Aristarkás o Démás o Luká ham tará saláma kanant.

²⁵ Hodáwandén Issá Masihay rahmat gón taw gón bát.

Balóchi Balochi

Balochi, Southern: بلوچی **Balochi (New Testament+)**

copyright © 2016 Wycliffe Bible Translators, Inc.

Language: Balochi, Southern

Contributor: Wycliffe Bible Translators, Inc.

www.balochimestag.com

www.youtube.com/user/balochifilm

All rights reserved.

2025-04-26

PDF generated using Haiola and XeLaTeX on 25 Apr 2025 from source files
dated 26 Apr 2025

fe99fc84-11bd-5637-a7f3-a8ffa8c1dea9